

堅

瓠

集

堅瓠補集卷之五

題藝祖像

辛虎子

姜堯章

辛稼軒經語詞

送王禹偁

僧道乞詩

周晉仙

燭剪

義燕

魏壇女真

唐六如詞

祝枝山詞

凌彥翀詞

鄧亭圖

陸放翁詞

補天穿

撲蝴蝶詞

銀蒜

馬浩瀾

詹天游

蘇軾

李師師

詞集怨事

白玉蟾

等身金

烏衣女子

坊曲

毛烈婦繡帽

陳敬叟詞

赤仙女廟詞

馬孟昭述懷

鄧干江望海潮

泥詭妮

送陳退翁詞

西湖送春

酒歌

酒微

成語

上皇賞雪

綠菜贊

朱希真

祭花園土神

康伯可詞

北客詩

千眼觀音

蔣氏嗜酒

下榻

打馬賦

紅芭蕉賦

黃蜀葵賦

砂椶子

草熏

花案

峨嵋佛現

陳憲副夢

師苦萬狀

焚書自歎

詩贈博徒

括兵作詩

女學士

人面桃花

閩雞檄

堅瓠補集卷之五

長洲石農褚人獲學稼纂輯

題藝祖像

濯纓亭筆記趙子昂善書有文名元世祖
聞而召見之子昂丰姿如玉照映左右世
祖心異之以爲非人臣之相使脫冠見其
頭尖銳乃曰不過一俊書生耳遂命書殿
上春聯子昂題曰九天閶闔開宮殿禹國

衣冠拜冕旒又命書應門春聯題曰日月
光天德山河壯帝居因出宋藝祖神像命
之題贊以觀其志子昂踈踏良久題曰玉
帶緋袍色色新一回展卷一傷神江南江
北新疆土曾屬當年舊主人世祖人喜

平虛子

政和徐貞一號平虛子能詩過仙霞關吏
訝其異服執訊之貞一瞪目不語羈之鄭

亭迨夜乘守者卧出袖中筆墨書一絕下
壁一劍凌空海色秋五皇賜宴紫虛觀
來跨鶴須彌頂指點培塿凡十洲
傳阿溫堆玉笙吹徹海桃開仰天一嘯江
風發笑接白雲歸去來題畢逸去明晨盛
傳有仙人至闕走着壁上字者不絕於道

姜堯章

姜堯章號白石道人南渡名家詞極精

妙不減清真樂府其詠蟋蟀齊天樂詞最
勝庾郎先自吟愁賦淒淒更聞私語露濕
銅鋪苔侵石井都是曾聽伊處哀音似訴
正思歸無眠起尋機杼曲曲屏山夜涼獨
自甚情緒西窓又吹暗語爲誰頻斷續
相和砧杵候館吟秋離宮弔月別有傷心
無數聞詩漫興笑籬落呼燈世間兒女寫
入琴絲一聲聲更苦

稼軒經語詞

辛棄疾字幼安言人生在勤當以力田爲
先故以稼名軒稼軒善作詞常自咏稼軒
集經語作踏莎行詞云進退存亡行藏用
舍小人請學樊須稼衡門之下可棲遲日
之夕矣牛半下去衛靈公遭桓司馬東
西南北之人也長沮桀溺耦而耕卽何爲
是栖栖者

送別王禹偁

翰山日記王禹偁謫黃州蘇易簡知貢舉
遣放榜易簡奏曰禹偁名儒今將行欲令
榜下諸生送於郊上可其奏諸生郊別元
之謂狀元孫何曰爲我致謝蘇公因口占
一絕云縱行相送亦何榮老鶴乘軒媿谷
鷺三人承明不知舉看人門下放門生

僧道乞詩

子菴雜錄有俗僧欲游鵝湖以卷子徧求
諸貴人贈詩閩中曹能始學在題一絕云
性內本無文字障縱耽山水亦支離我曾
一宿鵝湖寺峰頂禪師不要詩又萬歷初
有道士以詩卷索題於王弇州其卷中已
多翰苑諸公作弇州題云囊裡牛腰詩卷
粗他年鶴背重還無何如負局先生好只
挾真形五嶽圖牛腰二字見李白詩集

周晉仙

周晉仙名文璞宋淳熙間人義取郭璞故
字晉仙能詩詞有題酒家壁浪淘沙一詞
最佳還了酒家錢便好安眠大槐宮裏著
貂蟬行到江南知是夢雪壓漁船 盤薄
古梅邊也是前緣鵝黃雪白又醒然一事
最奇君記取明日新年其詞飄逸似方外
塵表

燭剪

元遺山載觀州倅武伯英燭剪一聯云啼
殘瘦玉蘭心吐蹴落春紅燕尾香當時以
爲新竒李君實先生謂上句無味因改之
曰春殘月魄暮頤動蹴落花鬚燕尾香已
而又得句云朱櫻墮圻金蟲墮絳樹花殘
玉燕斜更覺縵麗朱望子先生云啼殘三
句黃山谷詩香字亦無謂因成一律云雙

股彎環合又張周旋銀燭助輝煌頻吞月
影魚腮動時掠花鬚燕尾忙剔垢頓增紅
玉彩拂塵旋發紺珠光若教借照無須用
除是吹藜太乙傍

義燕

金安撫使田琢少從軍塞外所居有燕巢
人欲捕之琢輒爲保護一日燕飛止坐隅
畧無驚畏巧語移時不去琢思明日秋社

燕當歸矣此殆話別耶因作詩云幾年塞
外歷崎危誰道烏衣亦此飛朝向蘆汀知
有爲暮投茅舍重相依卿憐我處頻迎語
我憶卿時不掩屏明日西風悲鼓角卿應
先去我何歸細書爲蠟丸繫燕足後八年
珠爲潞州判官有燕飛來公廨繞戶而翔
止于硯屏琢締視之卽前燕也蠟丸尙在
遂繪圖作序一時名人皆有詩歌

魏壇女真

復齋漫錄臨川城南一里有觀曰魏壇蓋
魏夫人經遊之地具顏魯公諸碑以故女
真嗣續不絕而守戒者亦鮮洪覺範贈一
女真西江月詞云十指嫩抽春筍纖纖玉
軟紅柔人前欲展強嬌羞微露雲衣電袖
鼓好洞天春晚黃庭卷罷清幽凡心無
計奈閒愁試撚花枝頻嗅

唐六如詞

唐六如有黃鸝兒云細雨濕蒼苔
燕兒歸春愁如海深無底天涯馬蹄孤燈
翠眉馬前芳草燈前淚夢魂飛雲山萬里
不辨路東西風雨送春歸鳥空鳴花亂
飛青苔滿院朱門閉燈昏翠幃愁攢黛眉
伶俚形影汪浪淚惜芳菲登樓試望草綠
徧天涯

祝枝山詞

祝枝山有幽期賦皂羅袍云爲想鸞交鳳
友起殘燈淡月悄地綢繆一團嬌豔忒風
流驚忙錯過佳期候鶯慵燕懶春光怎留
蜂嫌蝶妬空擔悶憂歡情不比相思久

凌彥翀詞

凌彥翀蝶戀花詞一色杏花三百樹茆屋
無多更在花深處旋壓小槽留客住舉杯

忽聽黃鸝語 醉眼看花花亦舞
風妬殘紅飛過隣牆去
恰似牧童遙指處
清明時節紛紛雨
辭格清逸不讓宋元名家

郵亭圖

明初唐肅題陶穀郵亭圖云
紫鳳檀槽綠髮娉玉堂
兒慣可尋常作歌未必腸能斷
明日聽歌更斷腸
孫惟和有題秦弱蘭一首云
莫笑郵亭一夜春
此身原已落風塵

韓家亦有如花女
枕畔衣裳着向人
此詩足爲陶學士解嘲

陸放翁詞

陸放翁詞纖麗處似少游雄壯處似東坡
感舊鵲橋仙云華燈縱博雕鞍馳射誰記
當年豪舉酒徒一半取封侯獨去作江邊
漁父輕舟八尺低篷三扇占斷蘋洲烟
雨鏡湖元自屬閒人又何必官家賜與

補天穿

宋以前以正月二十三日爲天穿節相傳
女媧氏以是日補天俗以煎餅置屋上名
曰補天穿葛魯卿有驀山溪一闕詠天穿
節郊射也詞不甚工引以証其事云春風
野外卵色天如水魚戲舞綃紋似出聽新
聲北里追風駿足千騎卷高門一箭過萬
人叫燕落寒空裡天穿過了此日名穿

地橫石俯清波競追隨新年樂事誰憐老
子使得縱遨遊爭捧手無憑肩夾路遊人
醉卵色天用唐詩殘霞蹙水魚鱗浪薄日
烘雲卵色天之句東坡詩亦云笑把鴟夸
一杯酒相逢卵色五湖天後人改爲柳色
非又花間詞一方卵色楚南天注以卵爲
洲亦非卵色天蓋謂天青似卵色也

撲蝴蝶詞

茗溪漁隱載撲蝴蝶一詞不知誰作非弟
藻麗可喜其腔調亦有婉美詞云烟條雨
葉綠遍江南岸思歸倦客尋芳來較晚岫
邊紅日初斜陌上花飛正滿淒涼數聲羌
管 然春短玉人應在明月樓中畫眉懶
蠻箋錦字多少魚雁斷恨隨去水東流事
與行雲共遠羅衾舊香猶暖按撲蝴蝶正
格後段總春短下該上四下五今比前調

多二字又一體也或作上六字下三字誤

銀蒜

歐陽永叔做玉臺體詩銀蒜押簾窠地簾
蘇東坡哨遍詞曉起畫堂銀蒜珠簾雲垂
地蔣捷白紵詞早是東風作惡旋安排一
雙銀蒜鎮羅幙銀蒜益鑄銀爲蒜形以押
簾也宋元親王納妃公主下降皆有銀蒜
簾押數百雙

馬浩瀾

仁和馬浩瀾

洪號鶴窓善詩吟而詞調尤

工九日金菊對芙蓉云過雁行低鳴蜩韻

急紛紛月下亭皋向霜庭看菊敝館題糕

依然賓主東南美勝龍山迢遞登高繡屏

孔雀金盤螃蟹銀鑊葡萄痛飲鯨卷波

濤笑百年春夢萬事秋毫問臺前戲馬海

上連鰲當時二子今安在乾坤大容我粗

豪四絃裂帛雙鬟舞雪左手持螯又題許
東溟小景昭君怨云路遠危峰斜照瘦馬
風塵衣帽此去向蕭關向長安 便坐紫
薇花底只是黃梁夢裡三徑易生苔早歸
來

詹天游

詹天游以艷詞得名其送童羣天兵後歸
杭齊天樂云相逢喚醒金華夢吳塵暗斑

吟髮倚擔評花認旗沽酒歷歷行歌奇跡
吹香弄碧有坡柳風情通梅月色畫鼓江
船滿湖春水斷橋客 當時何限怪侶甚
花天月地人被雲隔却載蒼烟 招白鷺
一醉修江又別今回記得再折柳穿魚賞
梅催雪如此湖山忍教人更說此伯顏破
杭州之後也其詞全無黍離之感桑梓之
悲而止以游樂言上下偷安不亡何待

韎韐

韎韐國名古肅慎地產寶石大如巨栗中
國謂之韎韐文與可朱櫻歌有翡翠一盤
紅韎韐句萬魯卿西江月詞韎韐斜紅帶
柳琉璃漲綠平橋人間花月正新妖不數
江南蘇小恨寄飛花簌簌情隨流水迢
迢鯉魚風送木蘭桡迴棹荒雞報曉詩詞
中韎韐事甚多人罕知者故錄之

李師師

李師師汴京名妓徽宗微行幸之見宣和
遺事甕天腔語宋江潛至李師師家題念
奴嬌詞于壁云天南地北問乾坤何處可
容狂客借得山東烟水寨來買鳳城春色
翠袖圍香絞綃籠玉一笑千金值神仙體
態薄倖如何銷得 回想蘆花灘頭蓼花
汀畔皓月空疑碧六六雁行連八九只待

金雞消息義膽包天忠肝蓋地四海無人
識閒愁萬種醉鄉一夜頭白小詞盛於宋
而劇賊亦工章句如此

詞集怨事

宋蔡光工於詞靖康中陷金庭中勿安以
詩詞謂之蔡曰予之詩則宋也他日當以
詞名家稼軒歸宋晚年詞筆尤高嘗集怨
事作賀新郎云綠樹聽鴉更那堪杜鵑

聲住鵲鳴聲切啼到春歸無啼處苦恨芳
非都歇笑未抵人間離別馬上琵琶關塞
黑更長門翠輦辭金闕看燕燕送歸妾

將軍百戰身名裂向河梁回頭萬里故人
長絕易水蕭蕭西風冷滿座衣冠似雪正
壯士悲歌未徹啼鳥還知如此恨料不啼
清淚空啼血離恨我辭明月

白雲瞻詞

白玉蟾武昌懷古念奴嬌詞漢江北瀉下
長淮洗盡胸中今古樓櫓橫波征雁遠誰
見魚龍夜舞鸚鵡洲雲鳳凰池月付與沙
頭鷺功名何處年年惟見春暮非不豪
似周瑜凶如黃祖亦隨秋風度野草閒花
無限數渺在西山南浦黃鶴樓人赤烏年
事江漢庭前路浮萍無據水天幾度朝暮
詞亦雄壯但雨住句替叶暮字似誤

等身金

張子野歸朝懽詞云聲轉轆轤聞露井曉
汲銀瓶牽素練西園人語夜來風叢英飄
墜紅成徑寶猊烟未冷蓮臺香燭殘痕凝
倩等身金誰能得意買此好光景粉落
輕粧紅玉瑩月枕橫釵雲墜領有情無物
不雙棲文禽只合長交頸晝夜懽豈定爭
如翻做春宵永日曛曛嬌柔懶起簾押捲

花影等身金三字甚新本賈黃中傳賈黃
中幼日聰悟過人父取書與其身相等令
誦之謂之等身書

烏衣女子

宋紹興中杭都酒肆有道人攜烏衣椎髻
女子買斗酒獨飲女子歌曰朝元路朝元
同駕玉華君千歲載花紅一色人間遙
拉是祥雲迴望海光新二疊云東風起來

風起海上百花搖十八風鬟雲欲動飛花
和雨著輕綃歸路碧迢迢三疊云簾漠漠
簾漠漠天淡一簾秋自洗玉卮斟白酒月
華微映是空舟歌罷海西流或疑歌詞非
人世語記之以問一道士道士曰此赤城
韓夫人作法駕道引也烏衣女子蓋龍云

坊曲

唐制妓女所居曰坊曲北里志有南曲北

曲如明兩京之南院北院也宋陳敬叟詞
窈窕青門紫曲周美成詞小曲幽坊月暗
又暗暗坊曲人家草堂詩餘改作坊陌非
也謝臯羽天地間集載孟綆一作鯁南京
詩云愔愔坊曲傍深春活活河流過雨渾
花鳥幾時充貢賦牛羊今日上邱原猶傳
柳七工詞翰不見朱三有子孫我亦前生
梁楚士獨持心事過春門

毛烈婦繡帽

毛鶴舫先生女名孟年十三製繡帽遺柴
夫人靜儀以覆兒童頂許字方奕昭暨年
十七隨先生于浚儀宦邸方子從京師來
就婚時患脾疾已劇結襁甫三日而方子
歿烈婦以三朝新婦稱未亡人墜樓不死
絕粒十有九日而卒柴夫人臨終以繡帽
囑家婦朱少君采則曰當藏之篋笥以垂

永久康熙己卯春少君發笥見帽作七言
絕志感閨秀遞相傳玩以爲烈婦手澤相
與唱和成帙朱朱則順成詩烈婦從夫向
九泉因看遺繡一潸然相逢記得持相贈
藏在香奩二十年王元禮禮持一段幽貞
麗管彤鍼神還與薛娘同開奩忽墮思君
淚滴向當年手澤中嚴懷熊並苑深閨昔
日贈羅巾繡出名花不染塵篋笥頻開香

未絕至今猶憶隨樓人吳湘婉羅花羅半
幅抵千金持贈猶憐一片心莫遣爾翁覩
遺繡白頭悲汝恐難禁予得之錢唐友人
辛巳夏先生過予齋見之不禁泣數行下

陳敬叟詞

陳敬叟以莊號月溪有水龍吟詞晚來江
濶潮平越船吳榜催人去稽山滴翠胥濤
濺恨一襟離緒訪柳章臺問桃仙圃物華

如故向秋娘渡口秦娘橋畔依稀是相逢
處 窈窕青門紫曲舊羅衣新畚金縷仙
音恍記輕擺慢撚哀絃危柱金屋難成阿
嬌已遠不堪春暮聽一聲杜宇紅殷絲老
雨花風絮自註記錢塘之恨蓋謝太后隨
元人北去事也時太后年七十餘故有金
屋阿嬌不堪春暮之句惜其不能死難有
媿於苻登之毛氏竇建德之曹氏多矣

郝仙女廟詞

楊升菴詞品博陵有郝仙女廟仙女魏青
龍中人年及笄姿色殊麗採蘋水中蒼烟
白霧俄失所在其母哀泣水濱願求一見
良久異香襲人隱約於波渚間曰兒以靈
契託蹟綃宮主是水府世緣已斷毋用悲
悵而今而後使鄉社田蠶咸宜有感而通
乃爲吾驗後人立廟有題喜遷鶯詞于壁

云汀洲蘋滿記翠籠采采相將隣媛蒼渚
烟生金芰光爛人在霧綃鮫館小鬟頓成
雲散羅襪淩波不見翠鸞還但清溪如鏡
野花留靨音坎情捲驚變現身後神功緣
就吳蠶繭漢女菱歌湘妃瑤瑟春動倚雲
層殿彤車載花一色醉盡碧桃清宴故山
晚歎流年一笑人間飛電

馬晉述懷詞

扶風馬晉字孟昭作詞迷懷調寄滿庭芳
雪點疎髯霜侵衰髻去年猶勝今年一迴
老矣堪歎又堪憐思昔青春美景無非是
月下花前誰知道金章紫綬多少事憂煎
侵晨騎馬出風初暴橫雨又淒然想山
翁野叟正爾高眠更有紅塵赤日也不到
松下林邊如何好吳淞江上閒了釣漁船
鄧干江望海潮

金人樂府稱鄧干江望海潮詞爲第一雲
雷天塹金湯地險名藩自古臯蘭營屯繡
錯山形米聚喉襟百二秦關鏖戰血猶殷
見陣雲冷落時有鵬盤靜塞樓頭曉月依
舊下弓彎 看看定遠西還有元戎問令
上將齋壇區脫畫空堽零夕舉甘泉又報
平安吹笛虎牙間且宴陪珠履歌按雲鬟
來召英零醉魂長繞賀蘭山

泥泥妮

升菴詞品俗謂采言索物曰泥乃計切諺
所謂軟纏也杜子美詩忽忽窮愁泥殺人
元微之憶內詩顧我無衣搜畫匣泥他沽
酒拔金釵杜牧之登九華樓詩爲郡異鄉
徒泥酒皇甫非烟傳詩郎心應似琴心怨
脉脉春情更泥誰楊乘詩畫泥琴聲夜泥
書元鄧文原贈妓詩銀燈影裏泥人嬌柳

耆卿詞泥歡邀寵最難禁字又作記花間
集顧夔詞黃鶯嬌轉說芳妍又記得詭人
微歛黛字又作妮王通叟詞十三妮子綠
窓中今山東日婢曰小妮子其語亦古矣

送陳退翁詞

張功甫鎡善填詞嘗卽席作賀新郎送陳
退翁分教衡湘云桂隱傳杯處有風流千
巖勝韻太丘遺譜玉季金昆霄漢侶平

鸞坡揮麈莫便駕風飄
烟渚雲助精神衡岳
去向君山帝野鏘韶
濩蘭藝畹弔湘楚
南湖老矣無襟度
但尊前踉蹌醉飲唱
花顛仆只恐清時專
文教猶貸陰山狂虜
卧玉帳貔貅鉦鼓
忠烈前勦贊萬恨
望神都魏闕奔狐
兔呼翠袖爲君舞

西湖送春

梁貢父

曾燕京人大德初爲杭州路總管

政事文學皆有可觀西湖送春作木蘭花
慢詞問花花不語爲誰落爲誰開笑春色
三分半隨流水半入塵埃人生能幾懽笑
但相逢尊酒莫相推千古暮天席地一春
翠繞珠圍彩雲回首暗盡臺烟樹渺吟
懷拚一醉留春留春不住醉裡春歸西樓
半簾斜日怪銜春燕子却飛來一枕青樓
好夢又教風雨驚回

酒歌

明初徐州李冠傲盧仝茶歌作酒歌云蓬
壺影裏啼青鳥夢覺華胥春已曉吳姬携
酒叩我門連聲大叫驚隣媼口傳達官不
敢名開封嫩碧光銀罍呼兒不用借盤盞
巨碗亦足張吾兵一碗入靈府渾如枯槁
獲甘雨二碗和風生轍鮒得水鱗鬚輕三
碗肝腸熱掃却陰山萬斛雪四碗新詩成

揮毫落紙天機鳴五碗叱窮鬼成我佳名
令人毀六碗頭顱偏轟雷不覺聲連天七
碗玉山倒枕卧晴霞藉烟草醒來好惡不
自知寧能更爲蒼生惱蒼生四海非不多
聖明治化極中和矧今鼎鼐付房魏燮理
陰陽無偏頗吾當銜盃偃仰卧蓬草解衣
鼓腹堯民歌

酒檄

李俊民字用章金承安五年狀元尋棄職
還山作酒檄云人生貴在意適我輩况復
情鍾念樂事之難兼須同欲之相濟山堂
主人作真率會闕見在身掉船尋貧老於
稽山齋具邀淵明於栗里盜甕而飲者醉
指甕而索者嘗伶婦無言宋犬不吠乃有
忘形爾汝痛讀離騷了一生於解蠶視二
豪如裸羸以其無公田而種秫故不待西

歲而乞柴莫謂寧逢惡賓亦可便稱名士
獨不與李將軍爲地方且共汪諮議論兵
徒使汝陽涎流想見子幼耳熱醒猶未解
釀可速傾得到夫齊請鑒青州之事或薄
如魯未免邯鄲之圍惠而不傷客則有悔
成語

馮大夫懼內其夫人宋氏也人或謂之曰
無若宋人然馮卽應聲曰是爲馮婦也

上皇賞雪

宋淳熙八年正月二日奉太上於凌虛閣
排當午後大雪正是臘前太上甚喜謂官
家云今年正欠些雪可謂及時却甚好但
恐長安有貧者上奏云已令有司比去歲
倍數支散太上亦命提舉官於本宮支犒
如數命近侍進酒官裏上壽近臣獻詞云
紫皇高宴瓊臺雙成戲擊瑤苞碎何人爲

把銀河水剪甲兵都洗玉樣乾坤八荒同
色了無塵翳喜水消太液煖融鳩鵲端
門曉班初退聖主憂民深意轉鴻鈞滿天
和氣太平有象三宮二聖萬年千歲雙玉
盃深五雲樓迴不妨頻醉看來不似飛花
片片是豐年瑞太上太喜盡醉賜賚有加

綠菜贊

眉山志史琰字炎玉好學嫻文州刺史張

聞聘爲家子祺之配祺亦有才與炎玉唱
酬成集題曰和鳴黃山谷與張闇有內親
來訪之炎玉致書嘗緘綠菜以贈山谷爲
之贊曰蔡蒙之下彼江一曲有茹生之可
以爲藪蛙蟾之衣采采盈掬老以辛鹹宜
酒宜餽在吳則紫在蜀則綠其臭味同遠
故不錄願我百篇史君炎玉

朱希真

陸放翁集朱希真居嘉禾嘗有朋儕詣之
聞笛聲自烟波間起問之曰此先生吹笛
聲也頃之擗小舟而至則與俱歸室中懸
琴筑阮咸之類平日所留意者簷間青珍
禽皆目所未睹籃任置菓實脯醢客至挑
取以奉客其詩云青羅包髻白行纏不是
凡人不是仙家在洛陽城裏佳卧吹鐵笛
過伊川可想見其風致也

祭花園土神

宋孝宗植一松於苑特以牲醴祭花園土
神文曰神有百職職各不同典守草木土
祀是供我游湖園乃獲奇松植之禁苑百
態千容婆娑偃蓋天矯騰龍翠色凝露清
音舞風醉吟閒適予情所種壅培封植久
或力窮鳥鳥外擾蟻蠹內攻神其勦絕勿
使有終精邪竊據盜斧適逢神其呵逐勿

使遺蹤常令勁質坐閱隆冬堅踰五柳弱
異雙桐歷年萬禩鬱鬱葱葱牲牢旨酒嗣
錫汝功

康伯可詞

康伯可冬景詞調寄滿庭芳霜幕風簾閒
齋小戶素蟾初上雕籠玉盃醺醪還與可
人同古鼎沉烟篆細玉笋破橙橘香濃梳
粧懶脂輕粉薄約略淡眉峰
清新歌幾

許低隨慢唱笑語相供道文書針線今夜
休攻莫厭蘭膏更繼明朝又紛冗匆匆酩
酊也冠兒未卸先把被兒烘

北客詩

匡州之敗北客詠詩云當日陳橋驛裏時
欺他寡婦與孤兒誰知三百餘年後寡婦
孤兒亦被欺又詠汴城青城云萬里風霜
空綠樹百年興廢又青城蓋元之滅金亦

聚其諸王於青城而殺之

千眼觀音

楮記室宋孝宗擊毬馬偶傷一目金人遣使來慶壽以千手千眼白玉觀音爲壽蓋寓相諱之意孝宗命迎入徑山邀使者同往及寺門住持僧說偈云一手動時千手動一眼觀時千眼觀幸得太平無一事何須做得許多般使者聞之大慙

蔣氏嗜酒

倦游錄陸龜蒙妻蔣氏善屬文性嗜酒姊
妹勸節飲強食蔣應聲曰平生偏好飲勞
爾勸吾食但得尊中滿時光度不難僧知
業有詩名與魯望善一日訪陸談及蔣使
婢奉酒知業云受戒不飲蔣隔簾謂曰上
人詩云接岸橋通何處路倚樓人是阿誰
家觀此風韻得不飲乎知業慚而退

下榻

陳蕃爲樂安太守郡人周璆高潔士也前
後郡守招之不至惟蕃能致之爲置一榻
去則懸之今人止用徐孺子事而鮮及周
璆明閩中王郡丞鑛有詩云南州只說徐
高士能使陳蕃下榻時北海更憐周隱者
不將懸榻使人知

打馬賦

趙明誠幼時晝寢夢誦一詩覺憶三句云
言與司合安上已脫芝英草拔以告其父
父解曰汝殆得能久之婦矣言與司合是
詞字安上已脫乃女字芝英草拔則之夫
兩字非謂汝爲詞女之夫耶果得李易安
爲婦文辭繁著焉易安作打馬賦中云齊
驅驥騄疑穆王萬里之游間列兮黃類楊
氏五家之隊珊珊珮響方驚玉鐙之敲落

落星羅忽見連錢之碎或出入用奇有似
昆陽之戰或優游仗義正如涿鹿之師且
夫圯陵云遠白雲在天心存戀豆志在著
鞭止蹄黃葉何異金錢故繞牀大叫五木
皆盧漚酒一呼六子盡赤平生不負遂成
劍閣之功別墅未輸已破淮淝之賊今日
豈無元子明時不乏謝安何必效陶長沙
博局之投正當師袁彥道布帽之擲也

紅芭蕉賦

韓致光渥紅蕉芭賦中佳句云鶴頂儘伴
雞冠詎擬趙飛燕裙間一點願同白玉唾
壺鄧夫人額上微殷却賴水晶如意鴛舌
無端妬含桃而未咽猩唇易染酌浮蟻以
難醒大凡物之尤者必移人人之麗者必
動物僧虔蠟蜜一作炬爍柱棟以何藏潘岳
金銀徹繡緯而不隔天穿地巧幾人語絕

色難逢萬古千秋惟我絳紅英不盡

黃蜀葵賦

韓致光黃蜀葵賦有云萼綠華未見楊羲
冠簪披駢我杜蘭香喜逢張碩巾帔飄揚
動入妖冶馥鼻生香十里鵲雛浪得名於
太液三秋菊蕊虛長價於柴桑送日微困
迎風待翔螭翅堪憎蜂鬚可妬懊恨張京
兆惟將挂炷沾眉悵望齊東昏却把金蓮

褊步騷人易老絕色多秋暎葉似擎歌扇
偎闌若墜粧樓板條立處林鳥應笑於后
棲欹枕看時梁燕或聞平長嘆○孟昌黃
蜀葵詩有檀點佳人噴異香句

砂按子

陳藏器本草云砂按子生砂石中形如大
豆背有刺能倒行旋乾土爲孔常睡不動
生取之置枕令夫妻相悅湯若士武陵春

夢詩云細語春情惜夜紅妨人眠睡五更
風明朝翡翠洲前立拾取砂稜置枕中○
一作砂俘蜀人號曰俘鬱

草熏

佛經云奇草芳花能逆風聞熏江淹別賦
閨中風暖陌上草熏正用佛經語歐陽公
詞草熏風暖搖征興本此草堂詞改熏作
芳蓋未見文選者也

花案

順治丙申秋雲間沈某來吳欲定花案與
下堡金又文重華致兩郡名姝五十餘人
選虎丘梅花樓爲花場品定高下以朱雲
爲狀元錢端爲榜眼余華爲探花某某等
爲二十八宿綵旗錦幟自胥門迎至虎丘
畫舫蘭橈傾城遊宴直指李公森先聞而
究治沈某責放又文枷責遊示六門示許

被害告理下堡有嚴五於鼎革時取又文
餉已而又文告官置嚴五於獄嚴妻顧氏
因赴訴列干直指前李公杖斃又文於獄
而釋嚴松陵徐松花場卽事詩云自是雲
巖色界天綺羅簫鼓日紛然騷人競欲題
紅藥冶女私曾寄白蓮似欲酒澆歌舞地
何如粉飾太平年無端一夜西風起葉落
枝頭最可憐

峨眉佛現

峨眉山蜀勝景也山積雪六月不消遊者
必夏秋之交雖盛暑必挾纈以登山有石
能作五色光又時有佛光現將現有鳥名
佛現者連呼佛現光隨聲而出楊升菴有
詩云佛現佛現鳥語易隨人意變山川發
精靈草木呈蕊萼佛現佛現

陳憲副夢

朱秉器漫紀隆慶中廣東海南憲副慈谿
陳茂禮一夕夢三老人鬚眉皤白迎之爲
仙陳曰我官也何能爲仙老人誦詩云夢
回殘角銀河曉四顧青山獨有君次日上
官至一公解憇息見喬松三株恍然與語
曰昨者三老母乃卽此乎顧壁有詩云霜
姿雪調水壺客也來候館看行雲因思夢
中二句援筆續之命駕歸是夕遂卒

師苦萬狀

翰山日記今人好爲人師爲這碗飯可安
佚與殊不知先生之飯最難喫一塾師作
詩云晨興最苦無湯漱日同中時始食糜
檢點飢腸傳句讀撐持渴吻講文辭魚蝦
淡薄難供飯腐菜溫噉易泄脾怪殺更深
監夜課自辰至亥坐如尸詩雖俚句句是
閱歷過來語可補硯田詩笑之所未備

焚書自遣

毛序始於康熙庚辰夏日爲隣人不戒于
火室廬被焚其平時所藏書籍俱成煨燼
因作臨江仙詞自歎云數本殘書何足忌
祝融忽學秦皇一朝一炬盡消忘豈能重
購索空自費思量 焚硯雖然常發憤并
書焚去堪傷從今遣悶更無方將何來下
酒一斗竟荒唐

詩贈博徒

譚輅吳中有張姓者別號心石博徒也年六十客徵詩壽之張伯起戲贈一絕云博望聞孫隱博徒不須對酒亦呼盧今朝石上稱觴處試問添籌事有無誰而不虐爲可述也

括兵作詩

朱酒括兵不擇士族悉令赴軍自闕於毬

場有士子容止可觀進趨端雅酒問何業
曰學爲詩問有妻否曰有卽令作寄內詩
援筆立成云握筆題詩易荷戈征戍難慣
從鴛被暖怯向雁門寒瘦盡寬衣帶啼多
漬枕檀試留青黛在迴日畫眉看又令代
妻作詩荅曰蓬髮荆釵世所稀布裙猶是
嫁時衣胡麻好種無人種合是歸時底不
歸詩一作葛鵲兒泊遣以求帛放歸

女學士

明沈瓊蓮字瑩中烏程人相傳沈萬山之
後有廷禮父子者仕於朝瑩中因通籍掖
廷嘗試守宮論其發端云甚矣秦之無道
也宮豈必守哉孝廟悅擢居第一給事官
中爲女學士教諸妃嬪弟薄以貢仕至別
駕瑩中寄溥詩云一自承恩入帝畿難將
寸草荅春暉朝隨鳳輦趨青鎖夕捧鸞書

入紫薇銀燭燒殘空有夢玉釵敲斷未成
歸年來望汝登雲路同補山龍上袞衣有
相勉勵之意吳興人皆呼爲女閣老所傳
宮體諸詩熒好花盡不足多讓碧里雜存
作周溥殆誤

人面桃花

唐博陵崔護初舉進士不第清明獨遊都
城南得村居花木叢萃叩門久之有女子

自門隙窺而問之護以姓字對曰尋春獨
行酒渴求飲女子以杯水至啓關設床命
坐獨倚小桃斜柯佇立而意屬殊厚護以
言挑之不對護怏怏辭去送至門如不勝
情而入後絕不復至及來歲清明護忽思
及往尋之而寂然無人門已扃鎖矣因題
詩左扉云去年今日此門中人面桃花相
映紅人面祇今一作不知何處云桃花依舊笑

春風後數日復往聞內有哭聲叩門問之
有老父出曰君非崔護耶吾女自去年清
明後恍惚如有所失此日與之出到墓上
祭掃歸見左扉詩讀之遂病而死言畢大
慟崔請入哭之老翁許焉因入內見女尙
未斂護舉其首枕于股哭而祝曰護在斯
護在斯須臾自開半日復活老父大喜以
女歸之

闕雞傲

蓋聞昴日著名於列宿允爲陽德之所鍾
登天垂象於中平實惟翰音之是取歷晦
明而喔喔大能醒我夢魂遇風雨而喈喈
最足增人情思處宗窓下樂與縱談祖述
床前時爲起舞肖其形以爲幘王朝有報
曉之人飾其狀以作冠聖門稱好勇之士
秦關早唱慶公子之安全齊境長鳴羨群

黎之生聚決疑則薦諸卜頌赦則設於竿
附劉安之宅以上升遂成仙種從宋卿之
窠而下視常伴小兒惟爾德禽固非凡畜
文頂武足五德見推於田饒雌霸雄王二
寶呈祥於秦穆適種首云祝祝化身更號
朱朱蒼蠅惡得混其聲蟋蟀安能竊其號
既連飛之有勢何斷尾之足虞體介距金
邀榮已極翼舒爪奮赴聞奚辭乃飲啄頓

起戎心而埽桀隱若敵國兩雄不相並立
一息何敢自安養威於棲止之時發憤在
呼號之際望之若木忽然趾舉而志揚騰
之如神不覺尻高而首下于村于店見異
已者卽攻爲鵠爲鵝與同類者爭勝爰資
梟勇率遺鴟張縱衆寡各分誓無毛之不
拔卽強弱互異信有喙之獨長昂首而乘
絕勝鶴立敵翅以往亦類鵬搏搏擊所施

可卽用充公膳剪除畧盡寧猶容彼盜掃
豈必命付庖厨不啻魂飛湯火羽書捷至
驚聞鵙鳴之聲血戰功成快睹鷹鷂之逐
于焉錫之雞幃甘爲其口而不羞行且櫛
乃雞碑將味其肋而無棄倘違雞鑒之令
立正雞坊之刑牝晨而索冢者有誅不復
同於羣畜雌伏而敗類者必殺定當割以
牛刀此檄